

Xi³ ma³jao²-ni³ xon⁴xi³ pa²stro⁴Pedro
qui³squi³-le⁴nca³ts⁷i³

Pedro si¹ti²⁷nta³

¹An³ nia¹³ Simón Pedro, cho⁴⁷nta³-le⁴ c⁷oa⁴ pa²stro⁴-le⁴ Jesucristo. Ti²cji³-no³ jon² xi³ to⁴nco¹son² ma³cjain¹-no³ jo³-s⁷in² ma³cjain¹-na³jin⁴ nca³ jin⁴-jin⁴. Xi³ ma³cjain¹-na¹ n⁷ion¹ chji¹-le⁴. C⁷oa⁴-s⁷in² qui³ts⁷ai²-na¹ xi³ to⁴t⁷a³ts⁷e⁴ cjoa⁴qui²xi⁴-le⁴ Jesucristo xi³ Ni³na¹-na¹ c⁷oa⁴ xi³ tsa³c⁷a³sje³ntjai²-na¹. ²Ca²ta³s⁷e³-sa³no³ cjoa⁴nta³, ca²ta³njen³nch⁷an¹jin³-sa³ ni⁴ma⁴-no³, nca³ ña³qui³ nta³ ⁷yao³ Ni³na¹ cao⁴ Jesús Nai³-na¹.

C⁷oa⁴coan⁴ cjoan³² jo³ cjoan³ Ni³na¹

³Je² nca³n⁷ion¹-le⁴ Ni³na¹ qui³tsjao³-na¹ nca³yi³je³ xi³ ma³chjen¹-na¹ t⁷a³ts⁷e⁴ cjoa⁴vi³jna³chon³, c⁷oa⁴ xi³ t⁷a³ts⁷e⁴ nca³ nta³ ⁷ya³xcoan¹ nca³ je². C⁷oa⁴-s⁷in² qui³tsjao³-na¹ nca³ tsa³⁷ya³² je² xi³ qui³nchja⁴-na¹ to⁴t⁷a³ts⁷e⁴ cjoa⁴je³ya³-le⁴ cao⁴ nca³n⁷ion¹-le⁴. ⁴To⁴t⁷a³ts⁷e⁴ coi³ cjoa⁴-ve⁴ tsa³c⁷ai²-ni³na¹ xi³ qui³ni²s⁷e³nqui³-na¹ xi³ cjai¹nca³ nta³ tjjin¹, xi³ cjai¹nca³ tse³ tjjin¹, jme¹-ni³ nca³ c⁷oa⁴-ti⁴s⁷in² tjoe¹-si¹ni³no³ nca³ c⁷oa⁴coan⁴ cjoan³ jo³ cjoan³ Ni³na¹, nca⁴ tsa³qui³ncha³xin²-lao⁴³ je² cjoa⁴ xi³ tjio¹ i⁴ son³⁷nte³, xi³ si¹cji³tson¹-na¹, xi³ ts⁷e⁴ cjoa⁴chi⁴nca⁴. ⁵C⁷oa⁴-ti⁴ jon² n⁷ion¹ ti⁴sin³-lao⁴³ nca³yi³je³ je² cjoa⁴-vi⁴. Xi³ ma³cjain¹-no³ ca²ta³s⁷e³-le⁴ nca³n⁷ion¹. Je² nca³n⁷ion¹-no³ ca²ta³s⁷e³-le⁴ cjoa⁴chji⁴ne⁴. ⁶Je² cjoa⁴chji⁴ne⁴-no³ ca²ta³s⁷e³-le⁴ cjoa⁴nt⁷e¹. Je² cjoa⁴nt⁷e¹-no³ ca²ta³s⁷e³-le⁴ cjoa⁴tse³jta³. Je² cjoa⁴tse³jta³-no³ ca²ta³s⁷e³-le⁴ cjoa⁴xcon¹ta³con²t⁷a³ts⁷e⁴ Ni³na¹. ⁷Je² cjoa⁴xcon¹ta³con²-no³ t⁷a³ts⁷e⁴ Ni³na¹ ca²ta³s⁷e³-le⁴ cjoa⁴tjao²cha³ t⁷a³ts⁷e⁴

nts²ao³. Je² cjoa⁴tjao²cha³ t²a³ts²e⁴ nts²ao³ ca²ta³s²e³-le⁴ cjoa⁴tjao²cha³ t²a³ts²e⁴ nca³ts²i³. ⁸ Tsa² tj¹in¹-no³ je² cjoa⁴-vi⁴, tsa² ma³ncjin²ya³j³in³ ni⁴ma⁴-no³ je² cjoa⁴-vi⁴, li²coi³ tsjoa¹nte³-no³ nca³ coi⁴yo³ts²ao²³, nca³ ni⁴jme³-j²in² xi³ s²iaon⁴³. C²oa⁴-s²in² coi⁴ma³son²cao⁴³ je² xi³ ma³cho⁴ya³-no³ t²a³ts²e⁴ je² Nai³-na¹ Jesucristo. ⁹ To⁴nca³ je² xi³ tsin²-le⁴ je² cjoa⁴-vi⁴, xca⁴ ni¹, a³li²coi³ nta³ ma³tsen³-le⁴. Qui³si³cha³j³in³ nca³ je³coan³tsje³ ja^{4t}a³ts²e⁴ cjoa⁴ts²en⁴ xi³ co²tse³ qui³s²e³-le⁴. ¹⁰ Coi³ cjoa⁴ n²ti¹nts²e³, nqui²sa⁴ nta³ ti⁴xi¹ti¹ya³-lao⁴³ yao³-no³ nca³ coa⁴co²son²tsaon³ nca³ Ni³na¹ qui³nchja⁴-no³ c²oa⁴ tsa³cja³a¹j³in³-no³. Tsa² c²oa⁴s²iaon⁴³ je² cjoa⁴-vi⁴, ni⁴to⁴c²ia³-j²in² tsaon⁴nquio³. ¹¹ C²oa⁴-s²in² cjai¹nca³ to⁴nta³ c²oi⁴nte³-no³ c²ia⁴ nca³ coi⁴tja¹s²en³j³ion³ cao⁴ cjoa⁴je³ya³ je² cjoa⁴te¹xo³ma³ntsjai²-le⁴ Jesucristo xi³ Nai³-na¹ c²oa⁴ xi³ tsa³c²a³sje³ntjai²-na¹.

Coi³ cjoa⁴ nca³ qui³squi³ Pedro

¹² Coi³ cjoa⁴ li²coi³ coa²te⁴jna³jyoa¹³ nca³ si³cja³ai³tsjen³ ntsjai²-no³ je² cjoa⁴-vi⁴, nta³ tsa² je³yao³, nta³ tsa² je³ti³yo³n²ion¹j³in³-lao⁴³ je² cjoa⁴qui²xi⁴ xi³ je³tj¹in¹-no³. ¹³ Tjen⁴ nca³ ti²jna⁴j³in³-sa³ je² yao³-na⁴, c²oa⁴xian³ nca³ nta³ tj¹in¹ nca³ c²oa⁴-s²in² c²oe³ne²³-no³, nca³ si³cja³ai³tsjen³-no³. ¹⁴ Je³ve³ nca³ nti⁴ton⁴ coi⁴tjo³xin²-na³ yao³-na⁴, jo³-s²in² tsa³ca³co¹-na³ je² Nai³-na¹ Jesucristo. ¹⁵ C²oa⁴-ti⁴ cjai¹ n²ion¹ c²oe³ne²³-le⁴ yao³-na⁴, jme¹-ni³ nca³ cjoa⁴ai¹tsjen³-si¹ni³no³ nca³ntsjai² je² cjoa⁴-vi⁴ c²ia⁴ nca³ cjoe⁴ coi³ya¹³ an³.

Je² xi³ tsa³ve³-ni³ xcon⁴ cjoa⁴je³ya³-le⁴ Cristo

¹⁶ C²ia⁴ nca³ tsa³c²in²ya³-lai²⁴j³in⁴ xi³ t²a³ts²e⁴ nca³n²ion¹-le⁴ Jesucristo Nai³-na¹, c²oa⁴ jo³-s²in² nca³ cjoa⁴ai¹, li²coi³ qui³ni²sin³-lai⁴j³in⁴ xi³ to⁴cuento n²mi², xi³ to⁴j³in⁴ tsa³c²e²ntai³⁴-j³in⁴, to⁴nca³ je² xcoin³⁴-j³in⁴

c²oa⁴-s⁷in² tsa³ve³ je² cjoa⁴je³ya³-le⁴. 17 Ni³na¹ N²ai³-na¹ tsa³c⁷a³sje³nta³ c²oa⁴ ts⁷a³sje³je³ya³ Jesucristo c⁷ia⁴ nca³ tsa³cja¹cao⁴-ni³ jta⁴ xi³ ja³ai³-ni³ ya⁴ jña³ nca³ je³ya³ chon³ ya⁴ nc²a³jmi³ xi³ qui³tso²: Je²-vi⁴ ?nti¹-na⁴ xi³ cjai¹nca³ nta³ tjao²que⁴, jo³ nta³ qui³s⁷e³coan³ xi³ t⁷a³ts⁷e⁴. 18 C²oa⁴-ti⁴ jin⁴-jin⁴ qui³no²⁷ya²-lai⁴jin⁴ jta⁴ xi³ nc²a³jmi³ ja³ai³-ni³, c⁷ia⁴ nca³ ya⁴ to⁴jnc³ tsa³qui³yo³coai⁴-jin⁴ ya⁴ ni³nto³tsje³-ve⁴. 19 C²oa⁴-s⁷in² nqui²sa⁴ n⁷ion¹ ti¹jna³qui²xi⁴-na³jin⁴ je² en¹ xi³ to⁴nqui³-ni³ qui³s⁷e³ya³ta³coan³². Cjai¹nca³ nta³ n⁷iaon²³ tsa² si⁴sion³ je² en¹-ve⁴, jo³-ni³ tsa² jnc³ ya¹l⁷i¹ xi³ si¹⁷i³sen³ ?nte³ jña³ nca³ njion², jo³ sa³⁷nta³ nca³ s⁷e⁴sen¹, c²oa⁴ sa³⁷nta³ nca³ si⁴²⁷i³sen³jin³-le⁴ ni⁴ma⁴-no³ jo³-ni³ ni³ño³tse³. 20 Ti¹tjon² ca²ta³ma³cho⁴ya³-no³ je²-vi⁴ nca³ ni⁴jnc³-jin² en¹ xi³ qui³s⁷e³ya³ta³con², xi³ ts⁷e⁴ xon⁴ Escritura, xi³ to⁴xquia⁴ cho⁴ta⁴ tsa³c²e¹nta³. 21 Nca⁴ ni⁴χjin³ co²tse³ ja³⁷ai³ je² en¹ xi³ tsa³ca¹ya³con³-na¹, li²coi³-jin² nca³ c²oa⁴-s⁷in² coan³me³-le⁴ cho⁴ta⁴son³⁷nte³. To⁴sa³ qui³nchja⁴ya³ je² cho⁴ta⁴ xi³ tsje³ tjio¹ ja⁴t⁷a³ts⁷e⁴ Ni³na¹, jo³-s⁷in² qui³si³⁷i³sen³jin³ cjoa⁴fa³⁷ai³tsjen³-le⁴ je² Espiritu Santo.

2

Cho⁴ta⁴nti³so³ xi³ qui³nchja⁴ya³ t⁷a³ts⁷e⁴ Ni³na¹, c²oa⁴ cho⁴ta⁴nti³so³ xi³ va³co¹ya³

1 C²oa⁴-ti⁴ ya⁴ na⁴xi⁴na³nta¹-ve⁴ tsa³ca³tio² cho⁴ta⁴nti³so³ xi³ qui³tso² nca³ qui³nchja⁴ya³ t⁷a³ts⁷e⁴ Ni³na¹, jo³-s⁷in² s⁷e⁴jin³-no³ cho⁴ta⁴nti³so³ xi³ coa⁴co²ya³. Je² sca⁴ni²jin³⁷ma³-no³ cjoa⁴ xi³ si⁴²qui³tson¹-no³, c²oa⁴ li²coi³ coan⁴cjain¹-le⁴ t⁷a³ts⁷e⁴ je² Nai³-na¹ xi³ tsa³c²e¹chji¹ntjai² t⁷a³ts⁷e⁴. C²oa⁴-s⁷in² coa⁴²sjai³-le⁴ yao³-le⁴ xi³ nti⁴ton⁴ cha⁴jin³. 2 Ncjin² xi³ coai⁴tjen⁴nqui³-le⁴

ntia⁴² xi³ ch⁷ao³ tjin¹. Xi³ to⁴t⁷a³ts⁷e⁴ coi⁴nchja⁴⁷aon³-ni³le⁴ ntia⁴² xi³ qui²xi⁴. ³ Cao⁴ cjoa⁴xin²ta³con²si⁴²qui³njen³-ni³ xi³ to⁴t⁷a³tsaon⁴³, nca³ c⁷oa⁴na⁴cha⁴-no³ cao⁴ en¹ xi³ tsi² tsa² coi³ c⁷oa⁴tjin¹. Sa³⁷nta³ co²tse³ ti¹jna³co³ya³ cjoa⁴ñ⁷ain³-le⁴. Li²coi³ coan⁴tse³-le⁴, li²coi³ v⁷e²jna³fe² xi³ cha⁴jjin³. ⁴ Ni³na¹ li²coi³ qui³si³cha³t⁷a³-le⁴ je² a²ncje⁴ xi³ tsa³jnqui³ je¹, to⁴ya⁴² qui³sca³ni¹ jña³ l⁷i¹ ti¹ti², c⁷oa⁴ qui³si³c⁷e¹jna³n⁷ion¹ ya⁴ nca⁴jao⁴ jña³ njion² chon³, sa³⁷nta³ nca³ s⁷e⁴nta³jjin³-le⁴. ⁵ Ni³na¹ li²coi³ qui³si³cha³t⁷a³-le⁴ son³⁷nte³ jchi¹nca³, to⁴nca³ qui³si³ca³sen¹ jtsi¹n⁷ion¹ xi³ tsa³nca³son² son³⁷nte³-le⁴ cho⁴ta⁴ts⁷en⁴. Qui³si³c⁷e¹yo³con³ to⁴je² Noé xi³ qui³nchja⁴ya³ xi³ cjoa⁴qui²xi⁴, cao⁴ nqui² ña³to³ cho⁴ta⁴. ⁶ Ni³na¹ qui³si³cja³⁷a¹ cjoa⁴ñ⁷ain³ je² na⁴xi⁴na³nta¹ Sodoma cao⁴ Gomorra nca³ qui³si³qui³xo²ya³. To⁴chao³l⁷i¹ tsa³qui³ncha¹ne². C⁷oa⁴-s⁷in² tsa³ca³co¹cho⁴ya³-le⁴ je² xi³ tsa³ca³tio²-sa³, xi³ tsi² tsa² ve³xcon¹ Ni³na¹, je² cjoa⁴ñ⁷ain³ xi³ cjoa⁴⁷ai¹-le⁴. ⁷ C⁷oa⁴ tsa³c⁷a³sje³ntjai² Lot xi³ cho⁴ta⁴cjoa⁴qui²xi⁴, xi³ si³ coan³-le⁴ to⁴t⁷a³ts⁷e⁴ cho⁴ta⁴ts⁷en⁴ xi³ to⁴cjoa⁴chi⁴nca⁴ qui³tjen⁴nqui³-le⁴. ⁸ (Je² cho⁴ta⁴cjoa⁴qui²xi⁴-ve⁴ tsa³c⁷e²jna³jjin³-le⁴ cho⁴ta⁴ts⁷en⁴-ve⁴. Tsa³ve³ c⁷oa⁴ qui³nch⁷oe¹ xi³ c⁷oa⁴qui³s⁷in³ je² xi³ to⁴cjoa⁴ts⁷en⁴ tjin¹-le⁴. Nchaon³nchaon³ aon³ coan³-le⁴ nca³ nta³ tjin¹ ni⁴ma⁴-le⁴ je² cho⁴ta⁴cjoa⁴qui²xi⁴-ve⁴.) ⁹ C⁷ia⁴ ni⁴chjin³ nca³ fa³⁷a¹ cjoa⁴ñ⁷ain³, je² Nai³-na¹ ma³-le⁴ v⁷a³sje³ntjai² cho⁴ta⁴ xi³ ve³xcon¹ nca³ je². Ma³-le⁴ si¹c⁷e¹jna³tjao² je² xi³ tsin²-le⁴ cjoa⁴qui²xi⁴-jin², sa³⁷nta³ ni⁴chjin³ nca³ s⁷e⁴nta³jjin³-le⁴, jme¹-ni³ nca³ c⁷oa⁴-s⁷in² s⁷e⁴jna³ne²-ni³le⁴ cjoa⁴ñ⁷ain³. ¹⁰ Xi³ ti¹tjon², je²-ve⁴ xi³ fi²tjen⁴nqui³-le⁴ cjoa⁴chi⁴nca⁴-le⁴ yao³-le⁴, xi³ to⁴ya⁴² tjio¹ma³jjin³ cjoa⁴ch⁷ao³cjoa⁴jnti¹-le⁴, xi³ to⁴cjoa⁴sca¹ ve³con³ cjoa⁴te¹xo³ma³, xi³ n⁷ion¹ xi¹jjin³, cho⁴ta⁴ts⁷a³ntjai²cjoa⁴, li²coi³ tsa³cjon¹ nca³

nchja⁴⁷aon³-le⁴ xi³ nc²a³ tjio¹. 11 Ti⁴je²-ni³ a²ncje⁴, nta³ tsa² nqui²sa⁴ tj¹n¹-le⁴ nca³n⁷ion¹ cao⁴-ni³ je², nta³ tsa² nqui²sa⁴ ti¹tjon² tjio¹ma³ cao⁴-ni³ je², li²coi³ fi²co²n⁷tran⁴-le⁴, li²coi³ nchja⁴⁷aon³-le⁴ nqui³xcon⁴ Nai³-na¹. 12 Jo³-ni³ tsa² cho⁴ xi³ li²coi³ nch⁷oe¹, xi³ to⁴xa¹ c⁷oa⁴cjoan³-ni³ xi³ to⁴xa¹ qui³tsin³-ni³ nca³ coi⁴nto⁴va⁴ nca³ si⁴c⁷en³, je² cho⁴ta⁴-vi⁴ nchja⁴ch⁷ao³-le⁴ cjoa⁴ xi³ tsi² tsa² ma³cho⁴ya³-le⁴, to⁴jnc³ cao⁴ je² coi⁴ya²-ni¹ cha⁴j³in³-ni¹. 13 C⁷oa⁴-s⁷in² tjoe¹-le⁴ chji¹-le⁴ nca³ tsin²-le⁴ cjoa⁴qui²xi⁴-j²in². C⁷oa⁴-s⁷in² tsjoa³ ma³-le⁴, si¹ña³con³ yao³-le⁴ nta³ tsa² ni⁴chj³in³. Je² cho⁴ta⁴-ve⁴ jnti¹, tsen³ ch⁷ao³ cjoan³. Tj¹n¹-le⁴ cjoa⁴tsjoa³ nca³ v⁷a³na⁴cha⁴ c⁷ia⁴ nca³ tjio¹cj²en²cao⁴-no³. 14 Tj¹n¹nqui³nts³jai² xcon⁴ cjoa⁴cha³j³nqui³. Li²coi³ ma³-le⁴ tsjion¹ je¹-ve⁴. Si¹nt⁷e¹t⁷a³-le⁴ je¹ je² cho⁴ta⁴ xi³ to⁴i⁴ to⁴jan¹ si¹cja³ai³tsjen³. Je³c⁷oa⁴-s⁷in² coan³nca³-le⁴ ni⁴ma⁴-le⁴ cjoa⁴ch⁷ao³ntai³. ⁷nti¹-le⁴ cjoa⁴taon³ ni¹. 15 Qui³si³c⁷e⁷j³na³ ntia⁴²qui²xi⁴, xin² qui³-le⁴, nca³ qui³tjen⁴nqui³-le⁴ ntia⁴²-le⁴ Balaam, ⁷nti¹-le⁴ Beor, je² xi³ coan³tsjoa³que³ xi³ cao⁴ cjoa⁴ts⁷en⁴ qui³njen³. 16 Qui³no²cjoa⁴ti³cao⁴ xi³ t⁷a³ts⁷e⁴ cjoa⁴ts⁷en⁴-le⁴. Jnc³ cho⁴ch⁷a¹ xi³ tsi² ma³-le⁴ en¹, qui³nchja⁴ jo³-ni³ tsa² cho⁴ta⁴x⁷in⁴, tsa³c⁷e¹chj³oa²7a³ cjoa⁴sca¹-le⁴ je² Balaam xi³ qui³nchja⁴ya³ xi³ t⁷a³ts⁷e⁴ Ni³na¹. 17 Je² cho⁴ta⁴-vi⁴ jo³-ni³ tsa² nca⁴jao⁴ na³nta¹ xi³ tsin²-le⁴ na³nta¹, jo³-ni³ tsa² yo³jvi³xa⁴ xi³ fi²cao⁴ xquin¹. Xi³ t⁷a³ts⁷e⁴ je² cho⁴ta⁴ ti¹jna³tjao²-le⁴ cjoa⁴njion² ya⁴j³in³ njion²n⁷ion¹-ve⁴ nca³nts³jai² ni⁴chj³in³. 18 C⁷ia⁴ nca³ nchja⁴ en¹nc⁷a³ xi³ tsi²jme³ chji¹-le⁴, cao⁴ cjoa⁴chi⁴nca⁴-le⁴ yao³-le⁴ si¹nt⁷e¹t⁷a³-le⁴ je¹ je² cho⁴ta⁴ xi³ cjoa⁴qui²xi⁴ ji³tjo³xin²-le⁴ xi³ tsi² nta³ tjio¹ma³. 19 Si¹s⁷e³nqui³-le⁴ nca³ to⁴sca⁴ni²ntai¹, to⁴nca³ je² cjoa⁴chi⁴nca⁴-le⁴ va³te¹xo³ma³nts³jai²-le⁴. Je² xi³ qui³ni²qui³njen³-le⁴, na³nqui³ ti¹jna³-le⁴, jo³-ni³ cho⁴7nta³ ma³-le⁴ je² xi³

qui³si³qui³njen³-le⁴. ²⁰ Cjoa⁴qui²xi⁴ ni¹, tsa² je² xi³ c⁷oa⁴-s⁷in² tsa³qui³ncha³xin²t⁷a³-le⁴ je² cjoa⁴ch⁷ao³cjoa⁴jnti¹-ve⁴ xi³ tjin¹ i⁴ son³nte³, nca³ je³tsa³ve³ Nai³-na¹ xi³ tsa³c⁷a³sje³ntjai²-na¹, je² Jesucristo, tsa² nqui²jnc³c⁷a²tjio¹si¹c⁷o¹jⁱⁿ³ yao³-le⁴ cjoa⁴ch⁷ao³cjoa⁴jnti¹-ve⁴, je³qui³ni²qui³njen³-le⁴. To⁴nqui²sa⁴ ch⁷ao³s⁷in² tjio¹ xi³ fe³t⁷a³-ni³ cao⁴-ni³ nca³ to²ts⁷in³-le⁴ cjoa⁴. ²¹ To⁴nqui²sa⁴ nta³-ni³ tsa²cai³-ni³, tsa² tsi² tsa² tsa³ve³ ntia⁴² xi³ cjoa⁴qui²xi⁴, cao⁴-ni³ tsa² scan³-ni³ nca³ tsa³ve³, qui³si³c⁷o¹fa³ya³-ni³le⁴ cjoa⁴te¹xo³ma³ xi³ tsje³, xi³ tsa³c⁷ai²-le⁴. ²² Ña³qui³ c⁷oa⁴-s⁷in² cji³ma³-le⁴ jo³ tso² en¹ xo⁴ tso²: Je² nia¹ qui³squi³ne³ nqui²ntia³ nta¹vi³so³-le⁴, c⁷oa⁴ je² chi⁴nca⁴ xi³ je³tsa³ca³nco¹ya³ nqui²ntia³ tsa³ca³nco¹ya³ ya⁴jⁱⁿ³ nta¹si³.

3

Je² Nai³-na¹ qui³tsj^{oa}³ ts⁷oa³ nca³ cjoa⁴⁷ai¹

¹ Jon² xi³ tjao²que⁴-no³, ti²cji³-no³ nt⁷ai⁴-vi⁴ xi³ ma³jao²-ni³ xon⁴. Nca³ jao² xon⁴-ve⁴ v⁷e³ne²³-no³ jme¹-ni³ nca³ si³cja³⁷a¹-si¹ni³le⁴ cjoa⁴fa³⁷ai³tsjen³-no³ xi³ tsje³, ² jme¹-ni³ nca³ cjoa⁴⁷ai¹tsjen³-si¹ni³no³ je² en¹ xi³ co²tse³ tsa³ca¹ya³con³ je² cho⁴ta⁴ xi³ tsje³ tsa³ca³tio², xi³ qui³nchja⁴ya³ t⁷a³ts⁷e⁴ Ni³na¹, c⁷oa⁴ nca³ cjoa⁴⁷ai¹tsjen³-si¹ni³no³ je³ cjoa⁴te¹xo³ma³-le⁴ Nai³-na¹ xi³ tsa³c⁷a³sje³ntjai²-na¹, xi³ qui³ts⁷ai²-no³ to⁴t⁷a³ts⁷e⁴ pa²stro⁴-no³. ³ Ti¹tjon² ma³chjen¹ nca³ ca²ta³⁷yao³ je²-vi⁴, nca³ je² ni⁴χjin³ xi³ cjoe⁴t⁷a³ cjoa⁴⁷ai¹ xi³ tsj^{oa}³-le⁴ vi³jno²que³, xi³ ti⁴ts⁷e⁴-ni³ cjoa⁴chi⁴nca⁴-le⁴ c⁷oe¹ma³jⁱⁿ³. ⁴ C⁷oi⁴coi⁴tso⁴: Jña¹ ti¹jna³ ntai⁴ xi³ qui³tsj^{oa}³ ts⁷oa³ nca³ cjoa⁴⁷ai¹. Jo³ sa³⁷nta³ nca³ c⁷en³ xi³jcha¹-na¹, to⁴jo³ c⁷oa⁴-s⁷in² chon³ jo³ sa³⁷nta³ nca³ qui³s⁷e³nta³ son³⁷nte³. ⁵ Cjoa⁴qui²xi⁴ cai³-le⁴ scoe⁴ cho⁴ta⁴ nca³ cao⁴ je² en¹-le⁴ Ni³na¹ qui³s⁷e³nta³-ni³ nc⁷a³jmi³ ni⁴χjin³ co²tse³, c⁷oa⁴ je²

na³nqui³ xi³ ji³tjo³xin²-le⁴ na³nta¹-ve⁴, xi³ v⁷ai²nca³n⁷ion¹-le⁴ cao⁴ na³nta¹. ⁶ Cao⁴ na³nta¹-ve⁴ qui³cha³ je² son³nte³ xi³ qui³s⁷e³ c⁷ia⁴ ni⁴čhjin³-ve⁴ nca³ tsa³nca³son² na³nta¹. ⁷ Ti⁴je²-ni³ en¹-le⁴ Ni³na¹ ti¹v⁷e¹tjao² je² nc⁷a³jmi³ cao⁴ son³nte³ xi³ tjin¹ nt⁷ai⁴, jme¹-ni³ nca³ coi⁴ti⁴-si¹ni³ coi³ ni⁴čhjin³ nca³ s⁷e⁴nta³jjin³-le⁴ cjoa⁴, nca³ cha⁴ cho⁴ta⁴ xi³ tsi² ve³xcon¹ Ni³na¹. ⁸ To⁴nca³ jon² xi³ tsjoa³que⁴-no³, a³li² ni²cha³jjin³-jion²³ cjoa⁴-vi⁴, nca³ jnco³ ni⁴čhjin³ jnco³ jmi³ no¹ ma³-le⁴ Nai³-na¹, c⁷oa⁴ jnco³ jmi³ no¹ jnco³ ni⁴čhjin³ ma³-le⁴ Nai³-na¹. ⁹ Je² Nai³-na¹ li²coi³ si⁴²tse³ya² xi³ qui³si³s⁷e³nqui³, jo³-s⁷in² si¹cja³⁷ai³tsjen³ c⁷a³ nca³ ma³tse³ya²-le⁴, to⁴nca³ tjin¹-le⁴ cjoa⁴tse³ja³ xi³ t⁷a³tsan⁴². Cai³-le⁴ nca³ jnco³ xi³ cha⁴. To⁴me³-le⁴ nca³ cjo⁴i⁴cho² si¹c⁷a³ntjai²ya³ cjoa⁴fa³⁷ai³tsjen³-le⁴ nca³ts⁷i³. ¹⁰ Je² ni⁴čhjin³-le⁴ Nai³-na¹ cjoa⁴⁷ai¹ jo³-ni³ tsa² che¹ nca³njon². C⁷ia⁴ je² nc⁷a³jmi³ coi⁴xo⁴ya³, jo³ n⁷ion¹ cjoa⁴ne³ya³. Je² nca³yi³je³ xi³ si¹⁷i³sen³ nc⁷a³jmi³ coi⁴ti⁴, cha⁴. Je² son³nte³ cao⁴ je² tso³jmi² xi³ i⁴ tjin¹ coi⁴ti⁴. ¹¹ Tsa² nca³yi³je³ cjoa⁴-vi⁴ coi⁴xo⁴ya³-ni¹, jo¹-s⁷in² ma³nquin¹cao⁴³ yao³-no³ xi³ t⁷a³ts⁷e⁴ cjoa⁴ xi³ tsje³, c⁷oa⁴ jo¹-s⁷in² ⁷ya³xcon¹³ Ni³na¹. ¹² Je³ti³cho³ya²cao⁴³ yao³-no³, n⁷ion¹ me³ta³con²³ nca³ cjoa⁴⁷ai¹ ni⁴čhjin³-le⁴ Ni³na¹. C⁷ia⁴ ni⁴čhjin³ coi⁴ti⁴ coi⁴xo⁴ya³ nc⁷a³jmi³. C⁷oa⁴ je² nca³yi³je³ xi³ si¹⁷i³sen³ nc⁷a³jmi³ coan⁴ na³nta¹-ni³ cao⁴ l⁷i¹. ¹³ To⁴nca³ ti³cho³ya²-le⁴² nc⁷a³jmi³ cho⁴tse⁴ cao⁴ son³nte³ cho⁴tse⁴, jña³ nca³ ti¹jna³ntsjai² xi³ cjoa⁴qui²xi⁴, jo³-s⁷in² nca³ qui³tsjoa³ ts⁷oa³ Ni³na¹. ¹⁴ Coi³ cjoa⁴ nca³ ti³cho³ya²-lao⁴³ je² cjoa⁴-vi⁴, jon² xi³ tsjoa³que⁴-no³, ti⁴xi¹ti¹ya³-lao⁴³ yao³-no³ nca³ nta³ coan⁴nquin¹cao⁴³ yao³-no³, jme¹-ni³ nca³ coan⁴sjai³-si¹ni³no³ nqui³xcon⁴ Jesucristo, nca³ tsi² jme³ cjoa⁴jnti¹ tsi² jme³ je¹ s⁷e⁴-no³, c⁷oa⁴ nca³ nch⁷an¹ coi⁴yo³. ¹⁵ Cjoa⁴vi³tjo³ntjai² ca²ta³ma³-no³ je² cjoa⁴tse³ja³-le⁴ Nai³-na¹. C⁷oa⁴-ti⁴s⁷in² qui³squi³-

no³ nts⁷e³² Pablo xi³ tjao²cha³², jo³-s⁷in² tsa³c²ai²-le⁴ cjoa⁴⁷i³sen³ta³con². ¹⁶ C²oa⁴-s⁷in² nca³yi³je³ xon⁴-le⁴ qui³squi³t⁷a³ je² cjoa⁴-vi⁴. Tjio¹j³in³ c⁷a³ cjoa⁴ xi³ c⁷ai¹nca³ ñ⁷ain³ ma³cho⁴ya³-na¹. Je² cho⁴ta⁴ xi³ tsi² tsa² ma³cho⁴ya³-le⁴, xi³ to⁴⁷i⁴ to⁴jan¹ si¹c⁷a³-⁷ai³tsjen³, si¹c⁷a³ntjai²ya³ coi³ cjoa⁴-vi⁴. C²oa⁴-s⁷in² si¹cao⁴ xi³ c⁷a⁴⁷ai¹ xon⁴ Escrituras. Coi³ cjoa⁴ va³quin²-sa³le⁴ nca³ cha⁴. ¹⁷ Jon² xi³ tsjoa³que⁴-no³, nca⁴ je³qui³ni²qui³nč⁷oe¹-no³, ti⁴coi²ntao⁴³ yao³-no³, jme¹-ni³ nca³ tsi² tsa² c⁷oa⁴-ti⁴ jon² xin² ntia⁴² coan⁴nquin¹-si¹nio³, nca³ c⁷oa⁴na⁴cha⁴-no³ je² cho⁴ta⁴ xi³ ch⁷ao³ cjoan³, c⁷oa⁴ jme¹-ni³ nca³ tsi² tsa² tsao⁴jen³nqui³-si¹ni³ nca³n⁷ion¹-no³. ¹⁸ Ca²ta³ma³jcha¹j³in³-no³ cjoa⁴nta³-le⁴ c⁷oa⁴ cjoa⁴fa³⁷ai³tsjen³-le⁴ Nai³-na¹ Jesucristo xi³ tsa³c⁷a³sje³ntjai²-na¹. Je² ca²ta³vi³tjo³je³ya³ nt⁷ai⁴-vi⁴, c⁷oa⁴ sa³⁷nta³ nca³ ni⁴čhjin³ xi³ tsi² cjoe⁴⁷a³. C⁷oa⁴ ca²ta³ma³.

Xon⁴-le⁴ ni³na¹ xi³ tʔa³tsʔe⁴ Jesucristo

New Testament in Mazatec, Huautla (MX:mau:Mazatec, Huautla)
copyright © 1960 Wycliffe Bible Translators, Inc.

Language: Mazatec, Huautla

Translation by: Wycliffe Bible Translators, Inc.

Mazateco, Huautla [mau], Mexico

Copyright Information

© 1960, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, Huautla

© 1960, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30
